



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 3

Taoba mapang Brazil nung defender Ze Carlos süogo

Tang Israel nung India nung 30,000 jungnüa lir: Vikram Misri

VOL. XXII ISSUE NO. 18 (ADOK 18) DIMAPUR AMUNGNÜ (SUNDAY) MONGPUTENI (OCTOBER) 27, 2024 ₹ 5.00

Tribal HOHOs/Unions 12-i NFHRCC nungiter

Dimapur, October 26, 2024 (TYO): October 26, 2024 nü Dimapur nung Tribal HOHOs/Unions 12 den NFHRCC-i senden ka menogo.

Senden nung tatsü talang ajak lemsatepba sülen NPWD/Sorkari Foothills Road Construction Project dak sendakba nung Committee den asüngdangyatsü

mesüra anioker ang lemtet agitsüla ta bangjemtep.

2013 küm bangjemtepba ama iba mapatong nung politics aitdaksütsü memelar aser kari inyakra HOHOs/Unions-i anema noktaksü aser Foothills Road project kümzüka ayutsü ta senden nungsa telemtetba agiogo.

ILP atema district task force (DTF) tentettsüla: DNSU

Dimapur, October 26, 2024 (TYO): Dimapur Naga Students' Union (DNSU)-i Nagaland sorkar dang Inner Line Permit (ILP) mapa nung yariteptsü atema district task force (DTF) tentettsü shiogo.

Dimapur nung ILP mapa inyaksü atema nübo aser rongsen nüngdaker anungji sorkari iba maparen nung CSOs dendaksütsü ayongzüker ta DNSU-i ashi.

"CSOs-i renema lir aser yaritsü mulunga lir. Anungji state sorkari district shia nungi ILP mapa

inyaksü atema CSOs anioka district task force ka ka tentettsü mepishir" ta parnoki ashi.

"State sorkari ILP dak sendakba osang sangoktsü saka bendangertemi ILP meshitsü atema anogo mesüra mapang tejangja mezüngzüksü. Iba jagi public ratateper aser Dimapur aser temeket nung ILP malir özüng alema arur aika senzür. ILP atema online application kija agi dangbo meperir anungji iba ya paper nung akangkanga inyaksüla" ta DNSU-isa metetdaksüogo.

Chathe apu nung gari tulutem mesenzüdaksür

Dimapur, October 26, 2024 (TYO): Chathe (Patkai) River Bridge nungi Kohima leni axles 3 tema heavy motor vehicles (HMV) mesenzüdaksür ta Commissioner of Police, Dimapur-i metetdaksüogo.

Iba tenokdangba ya October 25, 2024 aonung 11:00 ako nungi tenzüko. Commissioner of

Nagaland-i National Highway 02 nung Road Safety Audit ka nüngdaker ta ashiba sülen iba tetuyuba agütsür ta CP Dimapur-i ashi.

National Highways and Infrastructure Development Corporation Limited (NHIDCL) nungi clearance mangu tashi iba tenokdangba alitsü ta CP-isa ashi.

Nagaland journalists atema pension scheme tenzüksü nenshi

Dimapur, October 26, 2024 (TYO): Kohima Press Club (KPC)-i Nagaland nung journalists atema pension scheme ka tenzüksü nenshiogo.

October 26, 2024 nü KPC-i Investment & Development Authority of Nagaland (IDAN) chairman aser Advisor to Chief Minister Abu Metha den senden ka amendang iba onük lemsatep.

Senden nung KPC-i press & media fraternity dak sendakba onük aika benoka lemsatep aser Northeast nung journalists atema pension scheme maliba state ji Nagaland dang lir ta nenshia ashi.

Abu Metha-i New Secretariat area nung Kohima Press Club building ka yanglutsü atema state

sorkar dangi abentsü nangzüker.

KPC den Dimapur aser Mokokchung Press Club temi küm aika state sorkar dang journalists atema pension scheme ka tenzüksü shiyonga arur saka tang tashi nung iba atema metenzük lir.

February 27 nü Budget Press Conference nung Chief Minister Neiphiu Rio-i küm ka tsüngda New Secretariat area nung lemezükba aliba kimung nung permanent Press Club building ka yanglutsü ta shia liasü.

Iba sangdong ya kanga tongtipang lir kechiyong journalists atema ki balaka alitsübaji kanga nüngdaker.

Honibarnü senden nung Media

Officer to the Chief Minister Ayieno Kechu aden aser KPC tenüng nung president Alice Yhoshü, vice president Asa Seyie, general secretary Vishü Rita Krocha aser treasurer Menguzotuoouo Linyü nung liasü.

"Kohima Press Club ketdangpurtem den senden tajung ka menogo. Onoki press aser media fraternity dak sendakba onük aika lemsatep aser media-i mapa tajungba inyaksü jembitep" ta Abu Metha-ia X nung lemsatep.

"Media ya democracy nung tongshi pezübuba lir aser nisung ajaki fourth estate tashi itdaksütsü atema yariteptsüla" ta paisa ashi.

KSU-i Shillong nung rail network anema noktaker

Guwahati, October 26, 2024 (Agencies): Khasi Students' Union (KSU)-i Meghalaya sorkar aser Meghalaya Tourism Development Forum (MTDF) dang Shillong nung High-Speed Luxury Rail Network (HSLRN) sentong meinyaksü ayongzüko.

"Onoki rail network magizüker kechiyong iba ajanga özüng alema arurtem den nisung tali arutsü" ta KSU General Secretary Donald V Thabah-i ashi.

State sorkari rail network melena education, healthcare, recruitment transparency, drug

control, aser infrastructure development, talisa road connectivity nung ang temulung agütsütsüla Thabah-i ashi.

Ozüng alema arurtem aser nisung talila aruba khuret koktettsü atema inyakyim ka metenzük tashi KSU-i Khasi-Jaintia Hills nung railway magizüksü ta paisa ashi.

Lisopurtem temeten kümzüka ayutsü atema Inner Line Permit (ILP) aser Meghalaya Residents Safety and Security Act (MRSSA) amala özüng takang nüngdaker ta Thabah-isa metetdaksü.

KSU-isa bendangertem aser permanent residents jangjatsü atema March 25, 1971 cut-off year asütsü akhanger.

ILP mapa tenzüksü ajanga terenlok aser rongsenketzüng renlokba nung tetsükdaksü kecha majurutsü. ILP benshiba state tem nung per-capita incomes teimba lir ta Thabah-isa ashi.

Manipur aser Mizoram nung rail network mali saka essential commodities nung jenjang dalanga lir ta paisa ashi.

Mizoram, Nagaland aser Arunachal Pradesh state tem nungbo ILP system tenzüka lir.

People's college, Mokokchung pur mezüngbuba 'October Fiesta' benjong amung

Mokokchung, 26th Oct (TYO): Mokokchung ya education tajungtiba anguba tzüpokdak tesem ta akümtsü asoshi merangtsüla aser ibaji ataloktsü asoshi riju ka ajungba kisüngi mesütet saka kakat riju ajak theological riju densema sakuku lirumedema atutsü nüngdaker. Iba o ya Mokokchung Deputy Commissioner, Thsuvisie Phoiji People's College, Mokokchung pur Mezüngbuba October Fiesta benjong 'breaking barriers' omen dak rangloker Multipurpose Indoor Stadium nung jembidang metetdaksü.

Nagaland nung Mokokchung district ya education tsütsü mezüngpur lir, aji oda, yangi nungi dang Christianity tenzüker aser iba den formal education densema talisa anüdoklen alirtem den iba temoatsüji lemsatep, ta pai Ao kin tenüng sanga ashi.

Tanü alima kanga renloka aoba den technology tejakleni aoba ajanga medemer, adianu, kinunger aser külem inyakeritem tsüngta tepilaba akümba angur. T.V, Internet aser Smartphone amala asen limai marudangbo asenok ajurutepea sensaksema liasü, saka tanü joko akhi ama ajurutepea sensaksema kanga



ajema kümogo, ta pai technology timi mamshiba ajanga asenok tepilaba kumdaksüba kuli ka lemsatep.

Iba den ano Naga nung ya kin onsara, iyongji lenmang aisü nung asenok tebilemba balala asür, anungji, kadi ka tongtettsü asoshi iba ama sentong ayongba den education tajung agütsüba ajanga omeni aginübaji ataloktettsü imlar, ta pai ashi.

Mokokchung nung kakat riju kwika lir, item ajak nungji kakatshir tokolok techirapur talisa koda masür kibongtem asoshi scholarship agütsütsü maongka lapoka yutsütsüla. Kakat rijutemi iba ama maongka lapoktsüra nungdakapur tajangzüker angutsü imlar, ta paisa ashi.

Mokokchung district nung aliba kakat rijutem nükjiding balala alitsü, aji oda, riju balala

tsüngta tetoktepba nela (competitive spirit) lidaksünür, ibaji nisung kar ajemzüka yoker kar temabai atutsüba indang ashir masü saka tanela tajung nung tetoktepbaji alitsüla, ta pai ashi. Tanü alima ya tetoktepba agi süngogo, yamaji rijutem rongnung tetoktepba kodang lidir, memeteti Mokokchung nung aliba rijutem ajungkettsü aser külemi aintsü, ta paisa shisem.

Mokokchung ya kanga dang teimla akaba tesem ka lir, anungji, ibai nübur education tajung anguba tzüpokdak tesem ka kumdaksütsü merangtsüla, iba nükjiding ataloktsü asoshi riju kar ajungba agi majungtsü, Mokokchung tejakleni onüra tajungtiba asoshi renemtsü nungdaker, ta paisa tebilemba lemsatep. Secular rijutem dang masü saka theological riju

densema liru medema atutsüla, jenjang ka kodang tongdir, tangalen nungi Mokokchung-i shisa aneti arutsübasa, ta paisa shisem.

Iba ama riju ka lapoka alima shisatsü arentsü lenmang lapoktsü nungdang Aor aser Mokokchung district ajangzüksü nükla yur iba college ya asensa tenzüker. College ka anepalua bener aotsübaji mapa temela masü, yangi teinyaksü aika sentaka lir, aji oda, iba riju tejakleni nükjiding ataloka aotsü asoshi nüburtem nungi amalitep aser sarasadem maneni akanger, ta People's College kibur tenüng nung RD & SIRD Minister, Metsübo Jamiri metetdaksü.

Iba riju ya tanga rijutem den tokteptsü asoshi lapoker masü, saka riju tajungba lapoka ao nung dang kakatshirtem tsüngta

tetoktepba akatsü aser iba ajanga kakatshir tajung adoktsü teimla nung tenzüker. Iba riju lapokshiba ajanga Mokokchung district nungi tangar atoksa kakatshir tajung karbo adoktsü tamang akar, ta ashi. Aji oda, iba riju nungi kakatshir tajung kar danga adokra Aor aser Mokokchung district asoshi temoatsü asütsü, ta paisa shisem.

Mokokchung district nung alirtem talisa koda masür kibongtem bendangleni moudaksüi pei atep nung education tajung agütsütsü nükjiding tulu lir, aser Mokokchung nunga college tajung ka lir ta asütsüsa aser Mokokchung nung alirtem nem bendangleni rongsen jenti intoka meyoki tangalen education agütsüba ama kasa maongka lapoktsütsü nükjiding lir, ta paisa metetdaksü.

Sentong nung People's College Principal, Dr. T. Amonglai tarurtem pela-a agizük. Clark Theological College aser Class of Music puri ken ajanga shilem agi. October fiesta nung kakatshir, tesayur aser telok balalai stall-tem lapoka chiyungtsü, aonsotsü, osettsüset aser asaya tapu balala asayatepa kanga longsetepa munga liasü.

Chakhesang areas nung quality education atema shisatokden agi



Phek, October 26, 2024 (TYO): Chakhesang Scholars' Forum (CSF)-i Chakhesang Public Organization (CPO) den yaritepa October 26 nü 'quality education in Chakhesang areas' indang shisatokden sentong ka agiogo.

Iba sentong ya Phek nung agi aser three-phase session nung mezüngbuba lir. Chakhesang area nung talisa elementary level nung shisaliok jenjang tajungba küm daksütsü nükjidong nung iba sentong agi.

Iba sabang ajanga Chakhesang nung scholars, academicians, teachers aser public leaders külemi sabang ka nung adenshia quality education atema lenmangtem bushitsü teimla lir.

"Asen lima nung quality education atema lenmangtem

bushiteptsü atema iba shisatokden ayonga agi. Iba sabang nung olemteptsü aser onüktem asadanger bangzüng renema mapa inyaksü" ta CSF Chairman Dr. Zavisé Rume-i ashi.

"Chakhesang area nung aser talisa elementary level nung quality education atema tebilemteptsü bena arur. Chakhesang nung rongnung CSF ya shisashir tematiba telok lir aser parnok nem iba tebilemteptsü kochtetsü atema shisatokden sentongtem ayonga agitsü mapa lezmüksüogoo" ta CPO President Vezuhu Keyho-i ashi.

Loktiliba tashi aittsü atema elementary education ya kanga tongtipang lir aser iba mapang tebilemteptsü abenba senso asütsü tangatetba agütsür, ta pai ashi.

Iba sentong nung shisalen

sayurtemji CSF Advisor Medozü Mero aser Associate Professor State College of Teacher Education (SCTE) Dr. Runi Nakro na liasü.

Sentong nungsa Joint Secretary CSF Rukuzo Rüho aser Secretary Academic and Journal Publication CSF Dr. Tsutshowe-ü Sekhamo nati technical sessions nung onir ama shilemagi.

Chakhesang areas nung SDEO Phek, Pfutsero aser Chozuba kübok school 189 lir. Iba nungi government school 131 aser private schools 58 lir ta General Secretary, CSF Dr. Gideon Phesao-i Statistics lemsatepdang ashi.

Taküm November ita Pfutsero aser Kohima nung kasa onük nung shisatokden sentong ana ayonga agitsü.

Ura Academy-i Writers Meet & Board of Directors Conclave agi

Kohima, October 26, 2024 (TYO): Tenyidie language body- Ura Academy (UA) ajanga Ura Academy Board of Directors Conclave (Ura Academy Chathako Kehou) aser Tenyidie Writers and Poets Meet (Kethumia mu Üzomia Kehou) ayonga agiogo.

Iba sentong ya Ura Academy (Badi) Headquarters, Mission Compound Road, Kohima nung agi.

October 25 nü Board of Directors Conclave agidang Rev. Beilieü Shüya-i wako atsüket aser Ura Academy Board of Directors züngsem P Sani Mao-i milen tsüklok.

Rev. Beilieü Shüya-i Ura Academy tenzükbaba osang lemsatep aser UA Vice-President Daso Paphino-i building yanglushiba osang metetdaksü.

Tanü Tenyidie Writers and Poets Meet agi aser Angami

Baptist Church Council (ABCC) President Rev. Savito Nagi-i milen tsükloksü.

Sentong nung UA President Dr. Shürhozelie Liezietsu-i Tenyidie Writers and Poets Meet tenzükbaba atema pelaba metetdaksü aser shilemagirtem dang maneni parnok mapa inyaka aotsü ayongzük.

"Tenyidie ya Nagaland University nung mezüngbuba oshi lir aser küm 26 tashi zünga arur. Tenyimi nung tar nung otsü, inyaksangshi aser sobaliba ajanga research agiogo aser sobaliba zülutsü meranger" ta Dr. Shürhozelie-i ashi.

Iba sentong nung Vizonyü Liezietsu-i Dievi mu mhasicako (Wisdom and Archaic Words), Dr. Shürhozelie Liezietsu-i Theza-e kedipuo ga?, aser Keviyiekhrieü Phewhuo ajanga bendenba Thie we a vie (Geizo da) sangro kaketem sayaogo.

Dimapur nung Photo Electoral Roll indang Draft Publication sayatsü

Dimapur, October 26, 2024 (TYO): Deputy Commissioner aser District Election Office, Dimapur ajanga Photo Electoral Roll indang Draft Publication sayatsüba osang metetdaksüogoo.

October 29, 2024 anepdang 11:00 ako nung iba sentong agitsü aser qualifying date ji w.r.t 1st January 2025 asütsü ta DC-i ashi.

Dimapur DC office indang Conference Hall nung iba mapa inyaksü.

Dimapur Additional Deputy Commissioner & Electoral

Registration Officer Zakabo V. Rotokha-i Draft Publication sentong nung sendaka alir ajak adentsü mepishia metetdaksüogoo.

Dimapur district atema DP&DB senden October 28, 2024 anepdang 11:00 ako nung agitsü ta tanga sangdong ka ajanga metetdaksüogoo.

Tesüiba nung iba senden anügdang 1:00 ako nung agitsü ta metetdakja liasü anungji sendaka alir ajaki mapang melenshiba meteta alitsü mepishir ta sangdong nungsa shia lir.

Livingstone Foundation International-i cyclist LZ Varte pelaa agizük

Dimapur, October 26, 2024 (TYO): October 25, 2024 nü Nagaland sorkari Cleanliness Drive agidang Livingstone Foundation International-i sentong tali meraketdakja Mizoram nungi nungtugu cyclist Vanlallawmzuala Varte (LZ Varte) pelashishia agizüka liasü.

LZ Varte-i States 28 aser Union Territories 5 sema senzür Cycling Tour last leg mapang

LFI-i pa pelaa agizük.

Varte-i linük nung mopung temerük nungdakba asoshi national awareness agütsütsü nükjidong nung Mizoram nung cycling tour tenzüka liasü.

Iba campaign dang 'Ride to Clean Air - All India Cycling Tour for Awareness Campaign on Clean and Green Sustainable Lifestyle' ta ajar aser Mission Life kübok agi. Iba sentong

nung Mizoram State Pollution Control Board-i teyari agütsür aser pai kilometre 17,000 sema senzütsü.

LFI nung pa pelashishia agizükba sülen school campus nung sensaksema mapang ka alidang LFI Chairman Dr. Andrew Ahoto Sema-i "Varte-i cycling expedition agiba ajanga lanur aika ajungmesor" ta ashi.

tEA-i "Run to Reforest" ayonga agi; Paralympics Medalist Hokato-i tenzüksü



Kohima, October 26, 2024 (TYO): Entrepreneurs Associates (tEA) ajanga kümshia ayonga agiba "Run to Reforest" nung nisung 471-i shilemagiogo.

Kohima nung asemtepbaji High School Junction nungi tenzüker aser Secretariat ajanga Indira Gandhi Stadium nung tembang.

Nagaland Athletic Association (NAA)-i technical assistance agüja Paralympics 2024 Medalist Hokato H. Sema-i run tenzüksü.

Iba sentong mezüngbuab

session nung Operations Supervisor tEA Chunjanglu Gracy menden liasü aser Pochury Baptist Church, Kohima Youth Pastor Japhet Pojar-i temoatsü meshia sarasadem.

"Süngdong ya lipoküm aser rongsen atema kanga tongtipang lir. Trees for Wealth (TfW) Movement ajanga Nagaland ya economic zone tajung ka ta sayutsü aser iba ajanga senotsü arentsü" ta tEA CEO Neichute Doulo-i ashi.

"R2 Run ya tsüngsang-

mopung melenshiba nung dang masü saka lipoküm nung ajemdaker NER India nung wealth landscapes adokdaksütsü atema temulung agütsür" ta Doulo-isa ashi.

2002 nung sepai ka ama alidang landmine apokdang pa tetsüng yiruba sülen teimla ajak samadok saka tasü itshir merangba ajanga Paralympics 2024 nung Bronze Medal ka angu ta Hokato H. Sema-i o jembidang ashi.

Paisa asemtepertem dang teimla mesamatsü aser

tayongzüktem ajuruaka meranga noktaksü ayongzük.

tEA Project Coordinator Chubazen Longkumer-i tanabuba session nung onir ka ama shilemagi.

Telemsa tenet nung takokertem:

Athletic Professionals (Male) - 1st Wede T Mero & 2nd M Nokching

Athletic Professionals (Female) - 1st Tsuchoi T & 2nd Songmpo

Working Professionals (Male) 1st Shiangjiu T Khamniungan & 2nd

Jonathan Working Professionals (Female) 1st Niansai T & 2nd H. Wannya Konyak

College & University (Male) 1st Sochiu & 2nd Jackson Yanphar

College & University (Female) 1st Jemei P & 2nd Nokethonu Sachu

14-17 Years (Male) 1st Kupe Vero & 2nd Vekhruzo Khusoh

14-17 Years (Female) 1st Jemei Y & 2nd Cekhrotalu

11-13 Years (Male) 1st P Athongti & 2nd Shachu

11-13 Years (Female) 1st Shekhrielu Lohe & 2nd Supe S

10 Years & Below (Male) 1st Shiusuthong & 2nd Sudeh

10 Years & Below (Female) 1st Yongmei & 2nd Sophia Gurung

Wheelchair (Male) 1st Lungrangsappe & 2nd Paurangyibe

Wheelchair (Female) 1st Tasangna & 2nd Kiviholi Achumi



October 26, 2024 nü Pune nung alima tzü-mopung wazüka ayutsü pusemertemi 'Vetal Tekadi' tenem wazüka ayutsü atema takhangba agüja longkak aitdang tangokba noksa nung angur.

Tang Israel nung India nung 30,000 jungnüa lir: Vikram Misri

New Delhi, Mongputeni/October 26 (Agencies): Foreign Secretary, Vikram Misri leniba nung External Affairs Ministry (EAM) nungi telok kati Parliamentary panel ka dang, tang Israel nung India nung 30,000 jungnüa lir, ta metetdaksü.

West Asia nung rara madokdang Israel aser India na tsünga tezungzüktep agia aliba nung ajemdaker India nung kistüjensür 9,000 aser alu nung inyaker 700 shi Israel-i oa liasü, aser Ministry-i Israel nung aliba India nungertem den yaritepa arudar, ta parnoki metetdaksü.

Misri-i aniba telokisa Parliamentary committee dang, Ato kilonser Narendra Modi-i jembiba ama tang West Asia nung raraba tensa ya ken o jembiba ajanga dang bentetdaksüner, aser ibaji India tangatetba lir, ta ashi.

Kasa senden nungji

Congress MP, Shashi Tharoor-i aniba Parliamentary Standing Committee nung züngsem karibo anüdoklen Ladakh nung arrtsülen India aser China na tsünga tezungzüktep agiba osang aser India aser Canada na tsünga tesendaktep raksaba osangtem-a metetpela liasü, ta Misri-i metetdaksü.

MEA ketdangsertemi onük ana nungji tongmelang agi telangzüba agütsü, kechiyong iba senden amenba tongti onükji Israel-Palentine tsünga raraba onük liasü, ta MEA-i metetdaksü.

Tesülen Shashi Tharoor-ia, senden nung o lemtep kanga junga kaogo, ta metetdaksü.

Ketdangsertemisa India-i Palestine ketdangsertem nem teyari balala agütsüba osang tejangja Parliamentary committee nem metetdaksü.

Misri-i, India-i Israel aser Palestine naprongla den tesendaktep tajung ayur, iba

denji külemi Ato kilonser Narendra Modi-i Israel Ato kilonser Benjamin Netanyahu aser Palestinian Authority tongti, Mahmoud Abbas naprongla den tongtepratepa jembir, ta metetdaksü.

Yaküm October 7 nü Hamas teloki Israel amakba sülen Ato kilonser Modi-i Hamas aija liasü, iba denji külemi Israel-i amakdang Palestine nung aliba hospital ka nung civilian aika asüba tatalokba-a aitsü, ta Misri-i committee nem metetdaksü.

Linük ana akümsüji India tangatetba lir, aser iba rara anentsü atema ken o jembitsüla aser yimtenren ajanga inyaksüla, ta paisa metetdaksü.

MEA-isa, Israel-Palentine tsünga rara tenzükbä sülen 'Operation Vijay' kübok India sorkari India nung 1,300 den Nepal nung kar densema anir aruogo, ta metetdaksü.

Jharkhand Assembly election atema MS Dhoni Brand Ambassador shim

New Delhi, October 26 (Agencies): Taruba Jharkhand assembly elections atema taoba mapang India nung cricket captain, Mahendra Singh Dhoni brand ambassador shimogo.

Dhoni-i assembly election nung pa indang noksa amshitsü atema Election Commission nem temelaba agütsüogo, ta Chief Electoral Officer, K Ravi Kumar-i metetdaksü.

Hokolbarnü Ranchi nung osangbenertem senden ka nung jembidang Kumar-i, "Mahendra Singh Dhoni-i pa indang noksa amshitsü atema Election Commission nem temelaba agütsüogo. Onoki tanga nungdak balala atema pa den tongtepratepa jembidar. Voters ajungshitsü atema Mahendra Singh Dhoni-i inyaksü," ta metetdaksü.

SWEEP (Systematic Voters Education and Electoral Participation) program kübok Dhoni-i awareness agüja voters ajungshitsü.

India nung cricket asayar nungtugutem rongnung Dhoni densema lir, aser pa Brand


ambassador inyakba ajanga voters aikati vote agütsütsü atema jangratsü, ta election commission-i imlar. November 13 nü Jharkhand nung assembly election mezüngbuba shilem nung constituency 43 nung vote agütsütsü.

Iba election atema nominations Hokolbarnü tembangogo aser candidates rongnung Chief Minister Champai Soren densema lir. Pai Saraikela menden nung tokteptsü.

All Jharkhand Students Union (AJSU) party Tir aser taoba mapang Deputy Chief Minister Sudesh Mahato-ia Silli assembly constituency nungi tokteptsü.

October 23 nü JMM-i mezüngbuba list nung candidate 35 tenüng sangdongogo. October 16 nü BJP-ia mezüngbuba list nung candidate 66 sangdonga liasü.

Jharkhand assembly election nung BJP-i All Jharkhand Students Union (AJSU), Janata Dal (United) aser Lok Janshakti Party (LJP) den lokteper tokteptsü.



October 26, 2024 nü Jammu & Kashmir Legislative Assembly nung Protam Speaker, Mubarak Gul-i MLA, Muzaffar Iqbal Khan nem office tenangzükbä agidaksü dang tangokba noksa nung angur.

Sorkari social media platforms dang bomb amokmeren agientsü tuyur

New Delhi, October 26 (Agencies): Ministry of Electronics and Information Technology (MeitY)-i social media platforms ajak dang Information Technology (IT) temzüng aser Bharatiya Nyay Sanhita (BNS) kübok inyaksü tuyuba den külemi social media nung bomb ajanga amokmerenba posts agientsüla mesüra temerenshi alitsü, ta metetdaksüogo.

Ministry-i social media platforms dang, IT temzüng kübok aibelenra IT Act kübok teküzmükba magütsütsü, ta metetdaksü.

IT Ministry-i sangdong ka ajanga, "Item ama bomb amokmeren ajanga tayimtsü nung senzürtem aser security agencies-i timtem kanga ajangshir aser tayimtsü services kanga mejungi kongshir. Bomb amshia amaktsü ta taila amokmerentem ajanga linük

tensa aser security raksatsür," ta metetdaksüogo.

"Item ama bomb amokmeren ajanga senso aika kongshiba den külemi linük rongsenkettzüng jenjang-a raksatsür. Item ama bomb amokmeren ya mazüokteter aser item ama amokmerenji social media sabang balala nung aiben lemsatepteter," ta IT Ministry-i metetdaksü.

Tesüiba anogo 10 tsünga bomb amshia amaktsü ta kanga bulua amokmerenba ajanga Air India, IndiGo, Vistara, SpiceJet aser tanga airlines indang tayimtsü 250 dak tali kongshio.

Airlines dang masü saka linük tesem balala nung hotels, schools aser tanga kiojentem amaktsü, ta taila osang kanga lemsatepdar.

IT Ministry-isa, social media platforms ajaki ghonda 72 tsünga item ama osangji ozüng benokba agencies nem metetdaksütsüla, ta tuyuogo.

BSF-i India aser Bangladesh arrtsülen security akangshir

Siliguri, Mongputeni/October 26 (Agencies): Tang Bangladesh nung tensa mejungi aliba nung ajemdaker Border Security Force, North Bengal Frontier-i India-Bangladesh arrtsülen security akangshio, ta ketdangsertem osang ka ajanga metetdaksü.

Talisa sepaitemi International arrtsülen aliba ayongtem nung security akangshio.

Osangbenertem den jembidang North Bengal Frontiers nung BSF IG, Suryakant Sharma-i, BSF-i arrtsülen intelligence wing tenzükgogo aser

sepaitemi arrtsü adena aittsü merangertem nokdangtsü atema yakyaka inyakdar, ta metetdaksü.

"Tensa mita reprangtsü atema onok indang Standard Operating Procedure (SOP) inyakyim lir, aser ozüng kübok parnoki nungdakba mera balala agia inyakdar. India anemertem inyaksangshi nokdangtsü atema sorkari inyaker," ta pai metetdaksü.

India aser Bangladesh na tsünga arrtsüji kilometer 4,096 talang lir aser iba nungjagi West Bengal kija nunga kilometer

2,216 talang lir. North Bengal frontier nung arrtsüji kilometer 936 talang lir aser iba nungjagi kilometer 110 nungbo atsü matsü.

Ano külen tanga osang ka nung, Honibarnü Siliguri kübok Baikunthapur nung aliba BSF Assistant Training Center nung BSF nung tetsür constable 385-i linük tenzüksü atema tenangzükbä agiogo. BSF North Bengal Frontier IG, Suryakant Sharma-i ketdangtsüa parnok nem tenangzükbä agidaksü. Iba sentong nungji BSF ketdangsertem aser parnok kibong züngsemtem aden.



October 26, 2024 nü Centre for Earth Sciences & Himalayan Studies aser National Centre for Polar & Ocean Research nati Khangri Glacier nung Automatic Weather Station ka aser Automatic Water Recorder ka amenokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, OCTOBER (MONGPUTENI) 27, 2024

Oang !

Tsüngremi mulungba mapa inyaksü asoshi aotsüla. Anungji, aotsü atema Tsüngrem dang temelaba meshitsü menügdaker saka moutettsüsaka aküm nung dang maotsüba atema Tsüngrem dang temelaba meshitsü nungdaksü. Laishiba nung asenoki Yisui pei tebu alidak jangratemtsü kotak lima toktsür alimai arua timtemseta Kalvary kangki dong nung asüba angur. Ibaji tebuü tenyaba mapa inyakba ka liasü. Iba kasaji, Yisua shirnokisa Pa sülen anidakner parnok pei tsürabur, adianu aser pei toktsür Pa sülen anidaktsüla ta metetdaksü. Tetezü, Yisu nütsüng asoshi pei tsürabur ki tajung medoktsütetba aser pei alidak nungi pilar timtema melitetba purtem metemsü. Kodang, Yisui Pa sülen anidaktsü asoshi nisungtem aja, nisung kati tamasa pa Yisu sülen anidaka maodang tebu tama aremstü temelaba meshi, ano katibo pei kinüngertem dang tepila o ashitsü temelaba meshiba otsü asenoki Luke tapu 9 : 59-60 nung shia angur. Ajisüaka, Yisui parnok shinga nema Pa sülen manidak tsüngda parnok inyaknüba parnok pei nungdak inyaksü temelaba magütsü. Kenü ni Nagaland nung MLA ka ajuru. Küna ken sensakema amendang, pai kü dang joko election-i anaben dang irbo Tsüngrem mapa inyaksü ta ashi. Atangji, Tsüngrem mapaji kechi mapa inyaksüar pai kü dang mashi, ajisüaka ni pa dang ashi, asenok arishi tatsüka nung ya, na taküm tajung tashi itta alidang na yimten mapa tama inyaksü aser na tambur kümer külen Tsüngrem mapa inyaksü ta bilembaji, ashiko Tsüngremi nü nem nai bilembaji inyaksü mapang magütsüsüa akok, iba tebilemba aser sentongji Tsüngrem tsüngdangbo temenünütsüka asütsüa akok ta ni pa dang shia liasü. Tsüngremi tenyaba mapa inyaksü atema bilemdang aser Tsüngrem mapa inyaksü ajungshitepba ola angashidang, iba tatalokbaji teti kü mulungjangi arur. Aji oda, ni ajuruba MLA-ba amaji asen tebilemba ajak inyakmar külenang Tsüngrem mapa inyaksü asoshi asenok aikati bilema alitsüa akok. Asen taküm, mapang aser rongsen ajak ya Tsüngremi agütsür ser nung asenoki aiben tenla nunga Tsüngrem tesü sūdaksür. Asen aginüba ajak alir aser inyaker külenang tesüsa tanünga sen tanük tera asenoki tenladak bener oa agütsür. Ajisüaka Yisui ashir, shibaisa kü sülen anidakner, pai pa akaba ajak toktsüsüla. Iba jagiang, Simon aser pa den yariteper Yakob aser Yohan nungertembo parnok akaba ajak toktsür Pa sülen anidak. Yisu sülen anidaktsü atema parnok parnok meyong rong aser parnok rong sünga pua aliba angotem to mapayu. Ashiko, asenokibo Yisu sülen anidaktsü lemtetyonga tamasa rongji yokmadi mesüra tamasa angotemji ki tongtsümadi ta shila. Aji oda, Yisui ajaba ya asenok mapa kar nung tamakok ngur alidang mesüra kecha maka timtema alidang masü saka asenok mapa nung takok ngua inyaka alidang aser asenok molamoshia akaba mapang ka nungang Pa sülen anidaktsü ajatsüa akok. Peter taküm nung ango teimtiba apuba anogo nungang Yisui Pa aja aser pai pa akaba ajak toktsür Pa sülen anidak. Aji oda, Samaria nung sayutsüngir Filip-i nisungtem dak nungi temenen tanüla aridoktsü aser shirangertem aneptsü aser nübortem ajak süngmangdakja temezünga mapa inyaker Simon-a dena temulung meyipdakja pa mapa nung kanga takok ngua sayutsüngia aliba mapang ka, ajungbena ka, Tsüngremi pa yang nung jagi lisem lima Gaza leni alutsü osang metetdaksü, anungji idangjisa pai apusoa ao. Asenibo, ashiko Tsüngrem tenyar dangji yangi nisung paikaya temulung meyiper jangrabangraa aliba mapang ka Tsüngrem o agi mesütsü melen, kodaser ni parnok toktsür ilen jagi aotsü ta kenbo shidangla. Tanü asenok aika Tsüngremer tenyaba mapa meinyaktetba aser Tsüngremi yokleni mounüba asenok mapa nung takok aser temoatsü anguba agi asütsüa akok. Asenok nem ki tajung moatsüba agi, chirnur moatsüba agi, gari moatsüba agi aser ita sen tajung chia jangratema alitsüsa moatsüba agi asenoki itemji toktsür mouteti alitsüa akok. Temulungjang nungbo 'oang' ta jembir saka item temoatsütemji toktsür mouteter ta nisung kar danga tanüla nung timtema lira, ken sarasadema bilemdangang aser koloni aotsü ta Tsüngrem dang asüngdangang.

OLEMSABANG

Nutsüng teimbai mulungba ajakbo shitak masütsü akok

~ L. Kika Pongener.

(Yashi adok nungi...)

Israel nunger Ijip lima nungi adokdang, Mosa ozüng lungpak abeni Sinai tenemi tur alidang, Israel-purtemi Aron dang, Ijip lima nung külemba ama külemtsü tsüngrem küang ta meshi. Aser Aron-i lokti tuluba/telok teimbaji mesoiteti parnok aginuba ama, Hon aser taribi küri bendener, Nashi chanu ka 'Sungyanglu' yanglur külemdaksü. Mosa meyipa aludang, Israel-purtem washitepa tsüngsangba ola angashi, aser Aron-i anir Nashi chanuji külema, tarung tenla agütsüba ngua Mosa kanga ain adoka jashi. Anungji Mosai Israel-purtem dang nenok rongnung shibasa Kibuba tsütsü lir...??? (Tetezü Nashi chanu külemdakji medeni shibasa lir) Parnokji kü dangi arung ta ashi. Idangji Livi kidong parnok ishika Mosa dangi aru (Anitet-32:1-26). Livi kidong parnok ishika dang ochi/shitak nung Tsüngrem tsütsü masetshi-i liasü. Tanüa lokti aika nung lenniri Aron-i inyakba ama, telok tuluba/nutsüng teimba peladaksünudang, kanga junga mebilemdangi aibelena telemtetba agir aser Tsüngrem jashidaksüba-a lir-ko. Tsüngremi o-i ashir...."Tamajung inyaksü asoshi telok tuluba sülen nai tanitak, mesura obendangdak ochi meyipsatsütsü merangba telok tsütsü nai tenen" (Anitet-23:2).

Kechi telok nung sudir suaka, lennir ajaki nuburtem nem pei tebilemba lemsateptsü/jembitsü sabang sadem-sadema lapoktsüsüla. Aji oda, nubur aikati pei tebilemba lemsatepa jembiba jagi, ashiko, lokti nung shisatsü tasen kar ngua telemtetba tajungba agia ken o telemtetba tajung ka nung tembangtsüa akok. Kechi mapa sudir suaka, nisung tsüngdang temeden amai suaka, Tsüngrem tsüngdang temeden mesura iba mapaji takok mangutsü. Alipokdang, mimchirtemi parnok tenung ayutsü atema anungtonga 'Long-ki' ka yanglutsü merangba, meyiper oshi mangatettepi lemsar tamakok anguba ama-to asütsü. Aji oda, ochi ya tapu ana lir....Tsüngremi mulongba ochi aser nisungi yangluba ochi. Asenoki Tsüngremi mulongba ochi nung ajemdaker telemtetba ajak agitsüla. Terasatsüka, tanü putu nung lennir kar dakbo....Onoki lemtetbaji dang shitak....Ibaji dang agitsü....Iba nungji masetshitsü ta tekong merangba-a lennir karbo alitsü akok. Anungji akokba tashi lokti nung lennir-i tip külen dang merangloki ajak tsütsü küsa ret-reta agitsüla aser ajak tsütsü küsa tejak shitsüsüla.

Akokba tashi lokti maparen ajak nung lennirtemi, tim mapa nungpo nuburtem-ia sadakjema metettsüsa (Transparency) tarentak kecha meli-i sadok-sadoka nubur den lemsateptsüla. Lokti ajungtsü atema kechi telemtetba agidir nubur nema odi-odia metetdaksüsüla. Lokti-ji nija kar/telok kar jurila meyong amai shinga-ia kibur küma tashi mamshitsüla. Kechiyong lokti-ji arok külem saru-molok agi alir aser lokti nungji tuluba-tilaba ta kecha telemsa mali arok küsa temeden lir. Tanü ama tashitemeteter putu ka nung, lokti nung nubur nem pei tangatetba/tebilemba lemsateptsü sabang sadem-sadema magütsüra, tashitemeteter lokti mesura tejakleni aoba lokti ka memesuki akümstü. Anungji tashitemeteter lokti nung, lenniri tashiyim agi ajepbanger nubur nem pei tebilemba jembitsü/lemsateptsüba nemdema/songtema ayutsü shinga-ia memerangtsüla. Lokti nung lennir ajaki nubur rongnung tanak-temesung mebendangi ajak den küsa benshitsüla. Lennir ajaki asen tenzüka mapang, asen lokti nung mepetmesu/telemsa madokdaksütsüsa kanga shisa kaa anitsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Pakistan nung puer aoba Khristan tetsür ka tsürabur ket nung agütsüogo



October 25, 2024 nü Diya Iftikhar (abelen nungi tasembuba) den lar tsüraburtem aser la atema ken o jembitsür attorney ana noksa nung angur.

Lahore, October 26 (Agencies): Hokolbarnü (October 25) Pakistan nung court kati arrshi küm 16 Khristan tetsür ka lar tsürabur ket nung agütsüogo.

Tetsürlaji Muslim nunger kati puer aoba sülen kangshia Islam yimsü dangi meyipdaksür kibong küma liasü, ta osang ka ajanga metetdaksü.

Taküm September 12 anogo nung Punjab province nung Faisalabad district kübok Chak No. 126-GB Sheroana yimdak alir Khristan, Diya Iftikhar ji Muslim nunger aseme puer oa liasü. Ghazaal Jutt aser pa den yariteper ana- Afzal Jutt aser Ramzan Jutt nungeri la puer oa liasü.

Hokolbarnü Additional Sessions Judge Jaranwala, Azhar Iqbal Ranjha-i tetsürla tetsü, Shahida Iftikhar indang temepishiba ken oji agizükba sülen parnok ket nung agütsü.

Court nung ken o jembiba nung Khristan kibong denji yariteper Christians True Spirit (CTS) nung chief executive, Asher Sarfraz-i, "Ghazaal Jutt-i Jaranwala nung Khristantem sempaba ajanga pai Diya Iftikhar puer ao. Tetsürlai

memelungi parnoki la puer ao. Prangpong agi amokmerena la dang, lai melunga Islam yimsü dangi meyip aser Jutt den kibong aküm ta shiang, ta la rongshia liasü," ta metetdaksü.

Sarfraz-i, Diya tanaben kidangi anir arutsü atema Christians True Spirits-i Lahore High Court nem temepishiba ken o agüja liasü, ajisüaka la puer aoertemi la amokmerenba ajanga lai kuli tai agütsü, aser ibaji ajanga October 10 nü court-i iba ken oji thinenja liasü, ta ashi.

Iba sülen CTS-i maneni Brihostibarnü Jaranwala Sessions Court nung temepishiba ken o agüja liasü, ta paisa metetdaksü.

"Court nung obendanger jagi Diya tejak nung tetsübu reprangtet, anungji pai court nung alir ajak dang takdang nungi luang, ta ashiba sülen la dang nungi kuli angadanga liasü. Iba sülen Diya-i court dang, lai memelungi la puer aoba sülen kangshia Islam yimsü agizükdaksür kibong aküm, anungji lai tsüraburtem dangi meypa oner, ta ashi. Iba kuli angaba sülen court-i la lar tsüraburtem ket nung agütsü," ta Sarfraz-i metetdaksü.

Court tetuyuba nung police-i Diya den lar tsüraburtem ki tonga meiner otsü, ta Sarfraz-i ashi.

Sarfraz-isa, parnoki Diya ji tanga ki ka nung lidaktsütsü tebilemba lir, ta ashi.

"Tai tonglokja alirtemji kasa yimdak lir, anungji Diya lar kidang alitsüji tasak asütsü. Ita ka piyong la tetsübu nung lia aruogo, anungji lai counsellor teyari nüngdaker," ta Sarfraz-i ashi.

Diya Iftikhar tetsüi CTS aser Christian Daily International-Morning Star News dang pelaba lemsatepogo.

Diya tetsüi, "Kü kinüngbu künati ozü den yariteper ajak dang pelar. La tanaben kidangi meypa aruba atema kanga pelar. Lai timtem aika ajangshia aruogo, ajisüaka Tsüngrem taochi ajanga la taküm tanaben asentenshitsü; ibaji onok teimla," ta metetdaksü.

Pakistan nung Muslim nungertemi Hindu aser Khristan tetsür tainlonglong puer oa kangshia Islam yimsü dangi meyipdaksür kibong akümba kanga bulua ataloker. 2023 küm nunga Punjab province nung Khristan tetsür 26 puer oa liasü.

ANO GO ABEN TSÜNGREM DEN

NÜJISO ANGUBA JENJANG

Nüjiba asoshi Khristai asenok nüji kümdaktsüogo. Anungji akang akanga noktakang aser joko tanaben alar tapuba süngra nung tapu. Galatia 5:1

Alima shi tsütsüa nüjiso anguba ya kanga dang tongtipang kechiaser tangar küpok talenba balala nung alitsüji temelabo masü iba nungi sala-a chiokba ajanga dang nübortem asüyonga, kilirtem asüyonga taküm nung tepela aser jangratem ajurur. Taküm ka talenba ajak nungi salaa n?ji küma sadoka aliba tetka alima nung anisüngzük jangratem maka.

Khristan ka shi aser tanela nung nüji agütsüsangji Yisu Khrista lir. Temenen talenba, tashidak talenba, shisabulu aser khuret balala talenba ajak nungi Pai nüji agütsüogo. 1 Peter 5:7 ashir, "Nenok shisabuluba ajak Pa dak yuang, kechiaser Pai nenok asoshi anübalur."

Tamanger ka teinyaktsü ajunga agi Yisu Khristai asenok nem nüji jenjang bener arutsüba asadanga seplasepshi mesüi mesüra züba-zülema mamangi akang-akanga nokdaka kuli tajung bener Pa den tembar küma amangtetsüba mapangji tang ya lir. Tamangera masü mamangera masü ta amangtetra tanaben alar tapuba süngra apurji na asütsü. Kodang iba tia jagi menüpdar tesasatsü, takoksa aser tesama tulu ajurutsü. Adianu asenia asen alangzüksang Yisui pei taküm rangben tenla-a alangzüktsüba nüjibaji ajangshia lir ma? Ibai ano mejangjai lira asen tamang ano ken tarokbai ia bushitsü merangdi.

Delhi nung aliba Jantar Mantar nung Khristantemi longkak ait



October 24, 2024 nü New Delhi nung Delhi NCR Christian Fellowship nungi lenirtemi osangbenertem den jembidang tangokba noksa nung angur.

October 26, 2024: India tesem ajaklen Khristantem anema inyakba kanga bulua atalokba anema Honibarnü (October 26, 2024) Jantar Mantar, New Delhi nung Khristantemi longkak aitogo.

Delhi NCR Christian Fellowship-i longkak aitba sentong ya anepdang 9:00 ako nungi nikongdang 1:00 ako tashi ayongzükba liasü.

Iba sentong nung Khristantemi India tesem balala, talisa BJP-i yimsüsüba state tem nung Khristantem anema inyakba tatalokba osangtem metetdaksü.

United Christian Forum (UCF)-i ashiba agi, 2023 küm India nung Khristantem anema

inyakba tatalokba 733 liasü, aser ibaji ita shia tatalokba 61 den kasa lir.

Taküm küm-a January ita nungi September ita tashi nung Khristantem anema inyakba tatalokba 585 lir, ta UCF-isa metetdaksü.

Item statistics nungji Manipur state nung atalokbabo densema mali. Yaküm Manipur nung rara adokba mapang nung Tenla ki 200 dak tali raksaja liasü.

Iba sentong ayongzükertemi Ato kilonser, Union Home Minister aser Minority Commissions nem temepishiba shidi aika agütsüogo, ajisüaka tang tashi telangzüba mangur, ta metetdaksü.

"Tebenja ozüngtem ajanga India linük temzüng nung aliba temedentem jenjang makai kümdaktsür," ta United Christian Forum nung otongdar, Dr. John Dayal-i metetdaksü.

Osangbener den jembidang pai, "Kodang tensa maremzüktetsüsa kümdir idanggi ang minorities-i longkak aiter, ajisüaka ibajia state-i azüoker. Tebilemtsü kaji-Parliament, judiciary, loktiliba aser media tashi meiti kümogo," ta metetdaksü.

Tawa Peoples Union for Civil Liberties (PUCL)-i "Criminalising Practice of Faith" ta ser report ka sangdonga liasü. Iba report nungji Khristantem anema inyakba

tatalokba aika nung police-i kecha meinyakba indang shia lir. Kasa report nungji anti conversion ozüngtem benoka aliba state tem nung Khristantem anema inyakba kanga bulua ataloker, ta shia lir.

Khristantem anema inyakba tatalokba ken o aika police-i süoki ia magir aser item ken oji ali-kiojen mesüra kibong dak sendakba mangatettep ajanga lir, ta ashir.

Honibarnü Delhi nung longkak aitba sentong ayongzükertemi India sorkar nem takhangba aika agütsüogo. Item takhangba rongnung - state aser central police dang

Delhi NCR Christian Fellowship-isa electronic media aser print media naprongla dang item ama tatalokbatem osang tejangja sangdongtsü metetdaksü.

Dayal-i, "Linük temzüng nung aliba temeden balala angutsü aser India senso ka ama asenok kümzüka alitsü asoshi longjemer nokdaksü atema Khristantemi tanga minorities den longjemtsüla. Longkak aitba sentong ya ajanga asen timtem aser asen teimla osang proker aser külem sensotemi asenok takhangba pusemstsü," ta metetdaksü.

angurtem nem senotsü teyari agütsütsü, sensakertem tenzükba Khristan mission schools nem senotsü teyari agütsütsü aser Scheduled Caste züngsem atema temsüa aliba telatetba nung 'yimsü' agientsü takhangba agütsü.

India tesem balala nung Khristantem, Khristan lenirtem, Arogo lenirtem, Khristan school tem nung principals aser tesayurtem aser Khristan hospital tem nung doctor aser nurse tem anema inyakba metetdaksütsü nükjidong nung longkak aitba sentong ya ayongzük.

Delhi NCR Christian Fellowship-isa electronic media aser print media naprongla dang item ama tatalokbatem osang tejangja sangdongtsü metetdaksü.

Dayal-i, "Linük temzüng nung aliba temeden balala angutsü aser India senso ka ama asenok kümzüka alitsü asoshi longjemer nokdaksü atema Khristantemi tanga minorities den longjemtsüla. Longkak aitba sentong ya ajanga asen timtem aser asen teimla osang proker aser külem sensotemi asenok takhangba pusemstsü," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Tapi

(adv) junga memeteti, mashimashi (guesswork)

* Asenok aikati tangar anema tapi agi o tamajung jembir.

Tapok

(n) sü mesüra jara ateta angutsüsa raksaba, teki (hole)

* Tanur ka longpant tapok semer jara tapok len nungi repranga liasü.

OLONG PAITEP # 6963

Grid for crossword puzzle #6963 with numbers 1-17 indicating starting positions.

TIPLIN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatemangtiba- (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6962 TELANGZÜBA

TIPLIN :

- 1. Kasa, 3. Azüpet, 5. Tejeminü,
8. Zutep, 9. Amang, 10. Mesen,
12. Lakzü, 15. Shisashir,
16. Nemten, 17. Atep.

LANGTSÜNGLEN :

- 2. Satet, 3. Asep, 4. Tsüngküm,
6. Ita, 7. Azümesen, 11. Shi,
14. Asen.

NAI-A YA METETTER MA



Bala Devi shiba dang India nunger tetsür football asaya nung "goal machine" ta ajar, lai Nepal nung 2024 SAFF Women's Championship nung Pakistan den asayaba mapang international jenjang nung goal 50buba idakja la ya India tsürtem rongnungi iba alizüng tongtetba mezüngbuba asayar kümogo.

Manipur nung telungpur tesep ana maktokogo



Imphal, Mongpteni/October 26 (Agencies):

Manipur kübok Bishnupur aser Imphal West ta tesep ana meita aoba mapang security force temi telungpur tesep ana maktokogo.

Meita aoba mapang sepaitemi, prangbong, injang aser bomb aika nguteta liasü, ta police temi Honibarnü metetdaksü.

Manipur police control room nungi sangdong ka ajanga ashiba agi, osang tejangja angazükba sülen Police, Army, aser CRPF longjemer Hokolbarnü Shantipur Makha

Leikai, Imphal West District meita oa liasü.

Sepaitemi ngutetba osettem rongnung single barrel gun ka, 9 mm pistols ana den magazine ana, 7.62 LMG magazine ka, M-67 hand grenades asem den detonator, tube launching ka, injang pongu, empty case 41 of ammunition aser tear smoke shells ana densema lir.

Iba tesep meketbang tenzüka mapang telungpurtem item prangbong injangtem toktsür jena oa liasü.

Kasa mapang nung ano Bishnupur District kübok Uyungmakhong tesep meita

aoba sentonga ka ayongzüka agiogo. SLR 7.62 mm ka, HE 36 grenades trok, grenade arm rings pezü, tear gas grenades ana, stinger grenades asem, dual shells pongu, blank cartridges trok, WT set (Baofeng) ana, BP jacket ana, IED (improvised local made) 2.3 kg approx ka aser detonators 4 ngutetba sülen iba tesep meita oa liasü.

Sepaitemi ngutetba osettem ta Manipur police nem bendanga agütsüogo aser temzüng ozüng dak ajemdaker parnokki jenjang tapet agitsü.

KSU maneni Shillong nung rail network anema nokdaker

Shillong, Mongputeni/October 24 (Agencies):

Khasi Students' Union (KSU)-i Meghalaya sorkar aser Meghalaya Tourism Development Forum (MTDF) dang Shillong nung High-Speed Luxury Rail Network (HSLRN) atema sentong yanglua aliba toktsütsü mepeshia metetdaksüogo.

Rail network anemba indang jembiba mapang KSU General Secretary Donald V Thabah-i, rail ajanga nüburtem aika state-i senoka aitba den ozüng alema nüburtem aika arutsü ta ashi.

Pai, state sorkar dang rail network melena education, healthcare, recruitment transparency, temesepba mozü azüokba, aser infrastructure

terenlok dak aser talisa lenmang ajanga tesendaktep tajung küma yanglutsü atema rangloker inyaksü mepeshia liasü.

Thabah-i ashiba agi, state nung temzüng ozüng alema arurtem aziüoktsü atema inyakyim tapet mebenok tashi KSU-i Khasi-Jaintia Hills nung railway bener arutsü inyakyim benokba anemtsü.

Paisa, lisopurtem temeden kümzüka ayutsü atema Inner Line Permit (ILP) aser Meghalaya Residents Safety and Security Act (MRSSA) amala legislation tashi tait nüngdaker, ta ashi.

Maneni KSU-i, March 25, 1971 ya bendangertem permanent residents ama agizüktsü asoshi tatemangbuba

anogo ama agitsü takhangba agütsüogo.

Thabah-i ashiba agi, ILP benokba ajanga terenlok maparen balala aser rongsenketzüng terenlok nung tetsükdaksü adoktsü ta ashiba ya tai.

Pai, ILP benoka aliba state tem per-capita incomes timba lir, ta ashi.

Temetetsü kaji Mizoram, Nagaland aser Arunachal Pradesh amala state tem nung ILP inyakyim benoka lir.

Oset jenjang aser rail jenjang indang asüngdangba mapang pai ashiba agi, rail network meliaka Manipur aser Mizoram nung tenüngdakba osettem nung jenjang tajemba lir.

Dhemaji nung nisung ka tepsetba atema nisung 3 apu

Guwahati, Mongputeni/October 26 (Agencies):

Assam kübok Dhemaji tesep nung Honibarnü nisung ka tepsetba atema tetsür ka densema nisung asem puogo.

Asüsang ya tetsür la indang taoba kinungbo liasü, ta jangjaogo.

Aija alir asem ya Assam nung Dhemaji kübok Jonai tesep nung pua liasü.

Parnok asem ya Banita Tao, Amar Tao aser Ashok Tao ta jangjaogo.

Police-i ashiba agi, asüsang ya Bhuban Konwar ta jangjaogo, shiba tawa temulung malemtsüsa sür lia nguteta liasü.

Osang ajanga ashiba agi, aija alir asem yagi pa asüba ya soseta asüba ama küm daksütsü meranga liasü, saka mapang tatsüka lir parnok asem pa tepset asütsü ta temulung meleme küma liasü.

Ken o bushisügangba sülen police-i pa ya soseta asüba masü saka tepset asütsü

ta jangja liasü.

Bhuban'er kinungertemi pa asüba ya Banita aser tangar nisung anadak tai tongloksüogo aser ashiba agi parnokki pa tepseta liasü.

Ajisüaka police sources kati ashiba agi, ken o kanga junga bushisügangba sülenang tejangja metettsü.

Nisung asem ya tang tashi nungbo temulung meleme bilemba ajanga dang pua yua lir aser ken o tejangja memetet.



Houston nung tir election atema nüboyimba sentong ayongzüka agiba mapang nungtugu kentener Beyonce (tachichi) aser Democratic nominee Vice President Kamala Harris na tangokba noksa nung angur. Iba rally nung Beyonce-i Harris pusema jembia liasü.

Israel-i Iran nung military base tem amak: Sepai ana tepset

Tehran, Mongputeni/ October 26 (Agencies): Iran army-i ashiba agi, Israel-i anüing ajanga military base tem amakba sülen sepai ana tepsetogo.

Israel-i, Iran nung parnok tesem balala takok ngua makogo aser meyiper parnok makra telangzüba tesashi agütsütsü ta ashiba sülen Iran-i iba osang lemsatapa liasü.

Israel army-i Honibar anepongi 2 ako sülen Iran nung military tamendakdak balala maka liasü.

Parnoki ashiba agi, Iran aser parnok den sendaktepa aliba teloktemi ita aika Israel amakba a t e m a telangzüba agüja parnoki item military base tem makogo.

Item tesemtem amakba sülen Israel military-i ghonda ishika lir parnok-i Iran amakba tembangogo aser parnok nukjidong atalokogo, ta metetdakja liasü.

Iran indang air defence headquarters-i sangdong ka ajanga ashiba agi, Ilam, Khuzestan aser Tehran province tem nung base tem makogo, saka parnoki takok ngua nokdangetogo.

"Tesem kar nung tilateri teraksatsüba karbo adokogo aser teraksatsüba adokbatem indang tang bushisingdangdar," ta parnoki ashi.

Iran-isa, Israel-i parnok amakba atema telangzüba agütsütsü asoshi parnok renema aliba sayuogo, ta semi-official Tasnim news agency-i metetdaktsü.

Tehran nungi Al Jazeera osangbener Resul Serdar-i ashiba agi, Israel-i Iran nung north, east aser south nung tesem balala makogo saka parnoki talisa linük yimtiba dak rangloker maka liasü.

"Israel nung sepaitemi Iran indang air defence systems, missile bases aser drone

facilities tem maka liasü," ta pai ashi.

"Tang tashi nungbo Iran nung ketdangsurtemi nisung asüba indang osangbo kecha metetdakja mali aser parnok indang multi-layered air defence system kanga takok ngua inyaksangshigo ta shia parnoki takok tulu anguba ama jembio," ta Resul-i ashi.

Kasa mapang nung Iran indang Civil Aviation Organization (CAO)-i ashiba agi, linük ajunga nung taoba

mapang ama tayimtsütem senzüsenpong tenzüko. Tehran nung Imam Khomeini International Airport mesüra tanga airport ka danga memaki liasü. Taoba mapang Israel military otongdar Daniel Hagari-i jelia mangaoka ayuba video ka ajanga ashiba agi, "Iran nung yimsüsürtem aser iba tesem nung parnok atema inyaksürtemi October 7 nü nungi Israel maka arudar, kong Iran litsü nungi Israel indang indang amakba densema lir." Paisa, telangzüba agütsütsü atema Israel mapa aser temeden lir, ta ashi. October ita tetenzüklen Iran-i Israel amakba sülen Israel-i telangzüba agütsütsü imla liasü. Iran-i Israel dak missile 200 shi khaloktsü aser occupied West Bank nung nisung ka tepseta liasü. Iran-i ashiba agi, ita ishika tsüingda Israel-i Lebanon nung amendaker aliba telok Hezbollah indang lenir, Hamas lenir aser Iran military lenirtem tepsetba atema telangzüba agüja parnoki Israel makogo. Israel-i amakba sülen

United States-i kati ka maktepba ya anentsü atema Iran dang Israel mamaktsü mepeshia liasü.

"Onoki Iran dang Israel mamaktsü mepeshir, ajita asünungdang tensa tamajungba mekümi rara anentsü," ta US National Security Council otongdar Sean Savetti-osangbenertem dang ashi.

"Israel-i parnok kümzüka ayutsü temeden aliba tashi amshia telangzüba agütsüogo aser nüburtem aliba tesemtem

d a k mekongshi military tamendakdaktem d a n g m a k o g o , k o b a I r a n d e n medemdangra parnokibo nitsüingyongstik

aika aliba yimtitem maka liasü," ta pai ashi. Iba inyakyim nung US densema maliasü ta shia pai, "Middle East nung diplomacy ajungkettsü aser tensa mejungi aliba süngjema kümdaktsütsü onok nukjidong lir," ta ashi.

Iran amakba atema linük aikati Israel aitsüogo aser azüzüktepba inyaksangshitsü ayongzüka liasü. Analyst Abas Aslani-i ashiba agi, Israel-i tang mezüngbuba Iran indang indanga amakba nangzüko. Paisa, Iran-i telangzüba agütsütsü ta imla atatsüla, ta ashi.

Hamas puri 2023 küm October 7 southern Israel amakba sülen Israel aser Iran na tsüingda tensa mejungi kümogo. Gaza nung rara tenzüka sülen tang tashi nung nisung 42,847 süogo aser nisung 100,544 yiruogo. Maneni taoba ita nungi Israel-i Lebanon nung Hezbollah pur kanga sashia amak tenzüka sülen iba rara nung Iran aser US nata densemetsü akok ta tsüba bilemer. Israel-i Lebanon yimtiba Beirut dena makogo.

Pakistan nung suicide bomber kati nisung ti tepset

Islamabad, Mongputeni/ October 26 (Agencies): Honibarnü Afghansitan den arrtsü nung Pakistan kübok Khyber Pakhtunkhwa province nung Mir Ali jila anasa checkpoint ka nung pei temang nung bomb alenoker pokdaksür kati bomb pokdaksüba sülen nisung ti tepsetogo.

Iba tesem amaksang ya motorbike rickshaw ka nung mener aru aser pai bena aliba bomb pokdakja liasü, ta local police ketdangsur kati AFP dang ashi.

Asürtem rongnung police officer pezü, state paramilitary force züngsem ana aser civilian ana densema liasü. Police ketdangsur yagisa, lendong nung yirur alir parnok pongu rognung asem kanga mejungi yirur lir aser temang anepalutsü atema iba tesem anasa aliba military mozüki kati anirogo.

Sorkar ketdangsur kati lendong nung nisung asüba indang osang ya AFP nem metetdakja liasü.

Afghanistan den arrtsü anasa check post ka nung police ketdangsur ter tepsetba sülen anogo ka lir iba lendong ya atalokogo. Hokolbarnü tatalokba ya Khyber

Pakhtunkhwa province kübok Dera Ismail Khan district nung ataloka liasü.

Telungpur 20 nungi 25 shi-i Frontier Constabulary post (police assistance force) maka liasü. Pakistan Taliban shirnok dang Tehreek-e-Taliban Pakistan (TTP) ta ajar, parnoki iba tesem amakba nangzüko.

2021 küm Afghanistan nung Taliban-i sorkar kümeteba sülen Pakistan nung kiralongrara tali poktetogo aser talisa Afghanistan den arrtsü nung aliba Khyber Pakhtunkhwa aser Balochistan province nung kiralongrartemi timtem agütsüdar.

Tawa North Waziristan nung kiralongrar anema jenjang agiba mapang telungpur aika tepseta liasü. Pakistan security forces-i tatemsa meita aoba sentong ayongzüka agiba mapang kiralongrar teku tepseta liasü.

Centre for Research and Security Studies (CRSS) report ka ajanga ashiba agi, 2024 küm azütokshi tali kümogo aser third quarter kija nung shilem 90 tashi timba küma liasü. Taküm ajak senteper nisung 722 süogo aser 2023 dang nungi asür timba kümogo aser nisung asüba ya shilem 97 bo iba province ana nung ataloka liasü.

Venezuela nung opposition activist ka sür lia ngutetogo

Caracas, Mongputeni/ October 26 (Agencies): Venezuela nung opposition lenir ka state custody nung ayuba sülen sür lia ngutetogo, ta pa sendaktepaba aliba political party-i ashi.

Centre-left party Voluntad Popular (Popular Will), shirnoki tir Nicolas Maduro-i aniba sorkar anema nokdaka arudar, parnoki ashiba agi, local lenir aser co-founder Edwin Santos, Venezuela kübok Apure aser Tachira state na tsüingda apu ka nung sür lia ngutetogo.

Santos ya anogo ana tejakdang Tachira state nung El Pinal tesemi oya aliba mapang state security services-i sota ayu, ta iba tesem nung aliba tenük kuli agütsürtemi ashiba Voluntad Popular-i metetdaktsü.

Par party-i Santos tepsetba atema Maduro yimsüsüba aitsüogo aser ashiba agi, iba ya yimden yimsüsüba dak sendakba nung telangzüba agütsüba ka lir.

"Edwin Santos dak kechi atalokogo iba ajanga tashiyim agi azüokba, nüburtem mezüngmeshia amshiba policy maneni benoka inyaksangshiba aser ozüing alema inyaksangshiba regime kati nisung tepsetba jangjashitsür," ta Voluntad Popular-i X ajanga metetdaktsü.

Linük nungi mitoker aliba opposition lenir Leopoldo Lopez-i social media ajanga, "Maduro lenisüba nung Edwin

Santos pur aoba onoki yashi aitsüogo," ta ashi.

Paisa, "tanü pa süogo. Pa tepset aser iba ya yimden yimsüsüba dak sendaka lir ta tejangja," ta ashi.

Party-i, Santos ya kanga tongtibang activist ka liasü, shibai par lokti atema tnokdaka liasü, ta ashi. Pai kinungtsü aser tanur ana toktsür süogo, ta parokisa metetdaktsü.

Taoba mapang US dangi Venezuela ambassador Carlos Vecchio-i Al Jazeera dang ashiba agi, pai Santos kanga junga meteta liasü aser pa ya nisung aser lenir tajung ka liasü.

Vecchio-i ashiba agi, Santos ta reshikangshia merenshiba sülen lenmang tezülen toktsü, kong pa nguteta liasü.

Venezuela nung opposition tem anema jenjang agia aruba sülen tang iba osang ya temai adokogo. June ita election mepetmesü nung agiba sülen Maduro-i takok ngua liasü.

Election tembangba sülen July 28 nü Venezuela indang national guard, police force aser armed group shirnok dang "colectivos" ta ajar parnoki longkak aiter 23 tepseta liasü.

Maduro anema toktepsang Edmundo Gonzalez, aputsü atema ozüing agütsüba sülen pa Spain-i jenaogo.

European Union-i yashi Gonzelez aser külem opposition lenir Maria Corina Machado na nem parnok indang human rights sempet tematiba agütsüogo.

K.S.U.M teloki MDFA Trophy-2024 final nung asayatsü jenjang tongtetogo



MDFA Trophy 1st Semi Finals Team Gilgal aser K.S.U.M tsungda asayadang tangokba noksa.

Mokokchung, October/Mongputeni 26 (TYO): Imkongmeren Sports Complex nung tanu nikongdang 1:00 Pm nungi tenzüka MDFA Trophy 2024 1st Semi Finals Team Gilgal aser K.S.U.M tsungda asayaogo. Tanu iba asaya nung Match Patron Wb. Sentiypang Junior .Engineer PHED. & Propreitor Hotel El Dora liasü.

Asaya tenzükli minute 2 buba nung K.S.U.M telok nungi J.no-9 David Konyak-i goal-1 yoktet ano iba sülen minute 25 Buba nung K.S.U.M telok nungisa J.no-17 Alie Konyak-ia goal-1 yoktet aser iba sülen asaya or minute 31 buba nung Team Gilgal telok nungisa J.no-12 Ato Chopi-i goal-1 yoktet aser iba sülenbo anisüngzükba mapang agi.

Anisüngzükba mapang agir kelen tanaben ground-i aita asayaba mapang nung telok

katia talila goal meyoktet saka MDFA Trophy-2024 final nung asayatsü maongka agitsü merangtepa asayatepdang Team Gilgal nungi J.no-5 Kutu aser J.no-12 Salangwati aser K.S.U.M telok nungisa J.no-10 Pangteih, J.no-17 Alie konyak aser J.no-8 Omwang par 5 yellow card achi. Iba asaya K.S.U.M teloki goal 2-1 agi Team Gilgal kokteta MDFA Trophy-2024 final nung asayatsü jenjang tongtetogo.

Kasa anogosa MDFA Trophy 4th Quarter Finals anepdang 8:00 Am nungi Telongjem F.C aser Eastern Wings asaya liasü. Iba asaya ya Yashi October 25 nü asayatsüba liasü saka Yashi Mokokchung town ajunga nung tziüsü along aser Imkongmeren Sports Complex nung tziüsü alongba ajanga iba match masayatetsüsa

akumba agi MDFA Trophy Organising committee, Telongjem F.C aser Eastern Wings telok pangjemer tanu asayatsü lemtetba tanep iba match asayaogo.

Iba 4th Quarter Finals asaya nung Telongjem F.C teloki goal 6-0 agi Eastern wings ayong ayonga kokteta MDFA Trophy Semi Finals asayatsü jenjang ajangziuktetogo.

October 27 nü MDFA Trophy 2024 nikongdang 1:00 ako nungi 2nd Semi Finals Super seniors aser Telongjem F.C tsungda asayatsü aser iba asaya nung Match patron Wb. Tialemba Ao. District Public Relation Officer, Mokokchung asütsü.

**2nd Semi Finals
28-10-2024 (Time : 1:00 Pm)
Super seniors
Vs
Telongjem F.C**

South Africa den asayamung atema India team sangdongogo

Mongputeni/October 26, 2024 (Agencies): South Africa den T20I asayamung atema India team sangdongogo. Iba asayamung ya November ita asayatsü.

Suryakumar Yadav lenisüba nung iba second-string squad ya SA den T20I asayamung nung asayatsü. Royal Challengers Bengaluru indang pacer Yash Dayal aser Vijaykumar Vyshak na den Kolkata Knight Riders' batter, Ramandeep Singh nung tang mezüngbuba India T20 team nungi asayatsü atema shimogo.

Asayar shimertemi maneni squad nung full-time opener ama Abhishek Sharma shimogo. Sanju Samson, shiba teti opener asayaba asayartem maliba mapang opener asayar, pa iba asayamung nunga opener asayatsü imlar. Bangladesh den asayaba mapang T20I tasembuba nung century ka yangluba sülen pa team nung maneni züngoksemogo.

Kasa mapang nung Axar Patel Test squad nungi züngtoker T20I team nung züngoksemogo. Maneni Varun Chakaravathy-a tanga asayartem den team nung densema lir.

Yash aser Vijaykumar nata T20I team nung züngoksema lir. Yash ya India Tests team nung

züngoksema liasü, saka tang tashi nung khen danga masayai lir. Left-arm pacer ya asayatsü asoshi maongka khen danga mongui team nungi aginogo.

Arshdeep Singh lenisüba nung India nung fast bowler tem asayatsü, kong Avesh Khan-a densema lir. Mayank Yadav yirur lir aser iba ajanga pa meshim. Shivam Dube-a yiruba ajanga team nung mezüngoksem.

Harshit Rana, shiba Bangladesh den asayamung nung T20I squad nung züngoksema liasü, pa Test squad nung züngoksema ajanga T20I asayamung nung masayatetsü. Pa tang tashi nung international asaya ka nung danga asaya mali

BCCI-i sangdong ka ajanga ashiba agi, Riyan Parag tapu tachichilen yiruba ajanga tang BCCI Centre for Excellence nung lir. T20I asaya pezü ya November 8, 10, 13 aser 15 nü asayatsü.

India team: Suryakumar Yadav (C), Abhishek Sharma, Sanju Samson (WK), Rinku Singh, Tilak Varma, Jitesh Sharma (WK), Hardik Pandya, Axar Patel, Ramandeep Singh, Varun Chakaravathy, Ravi Bishnoi, Arshdeep Singh, Vijaykumar Vyshak, Avesh Khan, Yash Dayal.

New Zealand-i otsüsütsüsa India nung Test asayamung ka kokogo



New Zealand aser India na tanabuba test asayaba noksa angur.
New Zealand-i run 113 agi India akok.

Mongputeni/October 26, 2024 (Agencies): New Zealand aser India na tanabuba test asaya New Zealand-i run 113 agi koka India team Kidang küm 12 tashi Test asayamung ka nung danga tamakok mongui asaya arua aliba tembangtsüogo.

Pune nung takok anguba sülen iba asayamung nung asaya asem asayatsü aliba nungi NZ team-i asaya 2 koka parnok tejakdang lir.

2012 küm Alastair Cook-i aniba England team-i India nung Test asayamung ka 2-1 agi akokba sülen India team-i asayamung 18 tashi khen danga tamakok mongui arua aliba tang tembangogo.

Tanabuba Test asaya tasemnübuba New Zealand pur nem run 255 dang yangludaktsür asayar ajak out sütsüba sülen asaya akoktsü atema India team-i run 359 yanglutsü nüngdaka liasü.

Asaya nung opener Yashasvi Jaiswal-i half-century ka yangluba sülen India team nem timla agütsü, ajisüaka Mitchell Santner-i ball kanga junga ona pai run 105 agütsür wicket 6 agia liasü. Iba asaya nung pai wicket 13 agi.

Iba sülen India nung asayartemi nikonngtsütsü tashi nung run 245 dang yanglur lia asayar ajak out süatok.

India team-i asaya kanga

kara tenzük aser Jaiswal-i mapang mintoki run 77 yanglua liasü, saka mezüngbuba innings nung wicket tenet agiba sülen Santner-i tanabuba innings nunga ball kanga junga aon tenzüka liasü.

Rohit Sharma, Shubman Gill aser Jaiswal nung ajak Santner-i out sütsü aser paisa Rishabh Pant ran out sütsüba sülen Virat Kohli out sütsü. Iba mapang nung India team-i asayar 5 out sür run 147 dang yanglur liasü.

Asaya nung Ravindra Jadeja-i kanga meranga nokdangdang, ajisüaka pa-a run 42 yanglur aliba mapang out süja liasü.

Taoba mapang Brazil nung defender Ze Carlos süogo

New Delhi, Mongputeni/October 26 (Agencies): Taoba mapang Brazil nung football asayar Ze Carlos arishi küm 56buba nung Hokolbarnü süogo, ya taoba mapang pa asaya aliba club, Sao Paulo FC-i sangdong ka ajanga metetdaksü.

Club sangdong ka ajanga ashiba agi, "temulung kanga zürepa Sao Paulo FC-i, Jose Carlos de Almeida, Ze Carlos Hokolbarnü Sao Paulo anasa Osasco nung asüba osang lemsateper."

Pa koda sür asü iba indang osang tejangja club-i memetdaksü, ajisüaka local media sangdong balala ajanga ashiba agi pa temulungjang mapa minyaki küma asü asütsü ta bilemer.

Ze Carlos ya 1998 küm football World Cup nung final tonga asayaba Brazil team nung densema liasü.

Iba asayamung masaya tsungda pa Brazil team nungi khen danga masaya liasü aser pa Flavio Conceicao melena shimba liasü.

Asayamung nunga pa group



Ze Carlos

stage aser Chile o Denmark na den knockout asayatem asayaba mapanga substitute dang liasü.

Pa Brazil team nungi semi-final nung Netherlands den asayaba mapang dang asaya liasü. Iba asaya nung pa suspend sütsür aliba asayar Cafu melena asaya liasü.

Iba asaya ya Brazil-i penalty metsütepba sülen koka liasü. Semifinal asaya sülen final nungbo Ze Carlos maneni substitute asayar ka aküm. Final asaya nung Brazil-i goal 3-0 agi France menoki liasü.

Pa professional football asaya nungi 2005 küm anena liasü. Pa career tepeyong nung Brazil team nungi khen danga asaya liasü.

BILEMDANGANG

"Nisung ajak dak tajung inyaktsü tashi lir."